



Kamis, 27 Juni 2024
Ogen : Hagai 2:15-19



Pasu-pasu Si Ipadanken Tuhan



Ibas pemetehe doni enda, lit prinsip kausalitas e me sebab-akibat. Bagepe i bas Pustaka pe ikataken maka lit hukum tabur-tuai. Janah si enda nggo jadi sada prinsip kegeluhen i bas alam semesta si lanai banci igugat. I bas Padan Si Ndekah pe tercatat i bas undang-undang Musa kerna sumpah/kutuk ras pasu-pasu/ berkat. Maka kalak sindalanken pedah ras singena ate Dibata ndatken pasu-pasu janah kalak si la ndalanken pedah ras sura-sura Dibata ndatken sumpah. Janah pengajaren enda pe tetap terbaba ku bas masa bangsa Israel mulih i bas pembuangan nari. Sura-sura Tuhan maka kenca kalak Israel mulih i bas Babil nari, maka si pemena si arus ilakokenna e me mbangun mulihi Rumah Pertoton Dibata. Sebab sura-sura Tuhan maka IA ras sura-suraNa arus ipelebe asangken kerina sura-sura manusia.

I bas sie, Tuhan mereken persinget man bangsaNa segelah mpelebeken mbangun Rumah PertotonNa, adi lang tentu lit konsekuensina eme sumpah ntah kutuk. Maka nina Tuhan kai pe dahin-dahin bangsaNa e bagi nuan-nuan labo ndatken ulih bagi siniarapken. Tapi adi nggo idungi bangsa e Rumah Pertoton e, maka mulai jenda nari terus ku paksa-paksa si reh maka Tuhan erpadan maka pasu-pasuNa tetap nge reh si mereken asil nandangi pendahin bangsaNa e.

Ula kari siakap kita kalak si liah erkiteken la pernah ngaloken pasu-pasu ibas Tuhan nari. Perlu cek dan ricek kerna kegeluhenta. Nggo nge kita mpelebe sura-sura Tuhan ibas kegeluhenta asangken sura-suranta jine?

Mekatep sikataken tujunta e me mpemuliaken Dibata bas kerina kecibal geluhta. Tentuna sienda jemba kita ngelakoken perbahanen-perbahanen sinisuraken Dibata subuk bas perukuren, pengerana ras perbahanenta si teptep wari. Pelebelah sura-sura Dibata e bas dirinta, segelah pasu-pasu e reh simparna.

Ndalanken sura-sura Dibata maba kemalemen ate.